

DISSERTATIO INAUGVRALIS MEDICA
DE
DEGLVTITIONE
ISTIVSQVE
LÆSIONE ET LÆSIONIS
THERAPIA

QVAM
GRATIOSI ORDINIS MEDICI CONSENSV

PRÆSIDE

D. JOH. CAROLO SPIES

ARCHIATRO WOLFFENBVTTLENSI ET
THERAP. PROF. PVBL. H. T. SVI ORDINIS
DECANO

PRO ADIPISCENDIS HONORIBVS ET
PRIVILEGIIS

DOCTORIS

D. XXII. DECEMBR. MDCCXXVII.

IN PVLEO MAJORI

PVBlice VENTILANDAM

EXHIBET

IVSTVS HENR. HECKENBERG
OSTERODA-HANNOVER.

HELMSTADII

TYPIS PAVLI DIETERICI SCHNORRII
ACAD. TYPOGR.

DISSEMINATED IN THE UNITED STATES

DECEMBER 1864

RECEIVED

GRANT

DAVID CARROLL

NO. 100

RECEIVED

RECEIVED



PROLEGOMENA.

I.



Ctio deglutitionis est actio adeo mirabilis & homini adeo necessaria, ut ea laesa misere homo vivat, ea vero penitus sublata, diu vivere non possit. Quoniam vero tam vario modo laedi potest & solet, operæ pretium esse putavi, ut, cum thema inaugurale mihi esset conscribendum, illudque dissertatione peculiari nondum ventilatum noverim, ejus læ-

siones paulo curatius examinarem atque exponerem. Haud quidem ignoro sub præsidio Cel. SCHACHERI ante viginti & quod excedit annos dissertationem de *Deglutitione* Lipsiæ esse ventilatam; quia vero in hac Autor deglutitionem solum physiologicæ, ut vulgo dicunt, sive in statu tantum naturali, considerat atque exponit, ab eo autem tempore varia adhuc nova eaque notatu dignissima circa deglutitionis organa ab anatomicis inventa atque detecta sint, non inutilem me præstiturum esse operam judicavi, quando loco speciminis inauguralis pleniorẽ paulo deglutitionis æconomiam sive historiam exhiberem.

ejusque non solum naturalem, verum etiam morbosum statum paulo penitius describerem atque ob oculos ponerem.

II.

Quod vero antequam faciam nonnulla ad clariorem rei intellectum præfanda esse existimo, atque sciendum esse puto, quod corpus nostrum tam in solidis quam in fluidis haud magnum temporis spatium idem permaneat, vel & permanere possit, quin mutationem subeat. Et hoc ex veterum jam philosophis quidam agnovit, inquiens; *hodie alii sumus, quam fuimus heri, & cras erimus alii, quam hodie sumus*: quibus verbis sane corporis nostri mutabilitatem & fragilitatem indicare voluit. Cum enim vita nostra consistat in perpetuo motu, & hic in actione fluidorum in vasa, & contra horum in illa; hinc atteruntur, mutantur, & patiuntur invicem, sicque ipsa vita mutationis corporis causa evadit. Si enim cordis motum, qui per totum vitæ curriculum indefinenter adesse debet, animo nostro perpendimus, quanto cum vigore atque impetu non perpetuo vibrat sanguinem in arterias ei annexas, ita ut si quis animal quoddam vivum aperiat, & secundum dorsi spinam in abdomine aortam comprimere tentet, vix poterit, & vehementem pulsum ac renixum sentiet: Sic quoque notum est, quod arteria cruralis vix digiti minimi crassitiem æquans totum crus pedemque, si alter alteri fuerit impositum, in contractione cordis elevare possit: & in carpo, si quis exploret pulsum, magnus certe is deprehenditur, & fit hoc toties in hora per omnem vitam, unde necessario vasa atteruntur & mutantur. Sed longe majorem subeunt liquida nostra mutationem, quanta enim copia iis non subducitur per salivam, per mucum in glandulis faucium, narium, per humorem gastricum & entericum ex apertis arteriarum osculis in ventriculum & intestina depositum, per excretionem urinæ & denique per insensibilem transpirationem, cæteras excretiones omnes sua copia superan-

rantem. Cum itaque per insensiles æque ac sensiles excretiones semper aliquid substantiæ laudabilis cum excrementitia e corpore eliminetur, & sic quovis fere momento corpus nostrum mutetur, totum sane sensim mutaretur, & denique inevitabilis ejus destructio insequeretur, nisi loco deperditi novum restauretur, vires cordis refocillentur, & sic novus quasi homo semper generetur: nam experientia constat nostros humores ob jejunium nimis diu protractum adeo acres fieri ob defectum nempe gelatinosi in sanguine, ut saliva gingivas, & urina vesicam erodat. Sic quoque comperitum est, lac in nutricibus, si per duodecim horarum spacium a cibo potuque abstineant, & interea infantibus ad deplendas præbeant mammas, ut eorum famem sedent, adeo acre reddi & plane urinosum odorem saporemque induere, ob novi chyli defectum, ut plane abhorreant infantes.

III.

Vt ergo partes nostræ detritæ renoveantur, & corpus actiones suas cum facilitate, oblectamento & constantia quadam exercere valeat, debebat nutriendi aliquod suppeditari: hinc opus erat ingredientibus quibusdam, quæ corpus nostrum evadere possint: necessaria quoque erant instrumenta recipientia & mutantia, quæ & digerant alimenta & successive mutant, antequam humoribus nostris permisceantur: nam neque ipsum lac animalium, teste experientia LOWERI in Tr. de Corde, si statim absque ulla mutatione prægressa sanguini per venas affunderetur, posset fluere cum illo, quin statim maxima præcordiorum anxietas & oppressio, cordisque palpitatio oriretur, & si ad vasa pulmonum minima perveniret, suffocationem & repentinam produceret mortem. Quam ob rem patet quam clarissime actionum naturalium necessitas & nobilitas, quæ assumpta qualibet actione viscerum, vasorum & humorum chylopoieorum ita mutant, ut corpori priori nunc mutato adsimilentur, ejusque naturam induant, veris-

verissimo Hippocratico dogmate, quod homo iis constet, quibus nutriatur, iisque nutriatur quibus constet. Quam egregie enim non prospexit humano generi summus rerum Effector, & quam abundanter nobis non largitus est alimenta tum ex regno vegetabili, quam ex animali, ut immensam ejus benignitatem nunquam satis prædicare possimus.

IV.

Instrumenta vero transmutationem degenerantium assumptorum in corpus nostrum inducentia sunt quæ chylopoiesi inservientia omnia esculenta & potulenta recipiunt, retinent, mutant, inter se miscent, conterunt, in liquorem sub lacteum magis magisque nostri naturam induentem convertunt, tandemque sensim per varia organa, horumque in corpore actiones ita mutant, ut corpus ipsum evadant. Actio vero hæc chylopoieseos per varia organa assumpta mutans in primis sic dictis viis, ore, pharynge & ei continuato angusto iterumque ampliato sacco membranaceo oesophagi, ventriculi, intestinorum ingesta in frusta dividit, solvit, digerit, liquidiora reddit, ope organorum respirationis, arteriarum & intestinorum in galactofera vasa eorumque ductum communem chyli ferum propellit, donec iterum in corde & pulmonibus vario attritu & conquassatione sanguini permisceantur, ut nutritioni & conservationi nostri corporis apta evadere possint.

V.

Alimenta itaque uti in os & ventriculum ingeruntur duplicia sunt, vel fluida & sorbenda, vel solida & magis coherentia: illa si assumuntur sine prævia mutatione statim deglutuntur, & per viam ab ore in ventriculum descendunt: hæc vero nempe solida moleque majora ulteriori præparati-
one indigent, ne si naturalem oesophagi expansionem superent, ibidem hæreant, unde sic non modo deglutitionem plus minus laboriosam redderent, verum etiam eandem pe-
nitur



nitus sufflaminando suffocationis modo periculum, modo ipsam etiam mortem inferre possent, de quali tristissimo eventu abunde observatorum libri testantur. Ne vero hoc contingat, necesse est 1) ut solidiora morsu discerpantur, quæ actio requirit, ut maxilla inferior à superiori versus pectus abducatur, & dein fortiter iterum contra maxillam superiorem comprimatur, ut sic intercepta octo dentibus utriusque maxillæ incisoriis conscindi queant, & in minora frusta redigi. 2) manducentur, quod fit, dum diductis iterum molliter maxillis præmorsum extremo linguæ prehenditur, & molaribus dentibus supponitur, ut ulterius comminui possit. 3) Saliva, muco, & aëre inter masticandum permisceantur, ut ulteriori solutioni & deglutitioni aptiora reddantur, quæ uberius exposita legi possunt in Celeb. HEISTERI Dissert. de Masticatione. Mansis, subactis, lubricatis & præparatis itaque sic cibis commode deglutiuntur, & ex cavo buccarum, palati & faucium per pharyngem & œsophagum in ventriculum deducuntur. Cum vero instituti mei jam sit plenior deglutitionis historiam exhibere, eam in tria dividam capita, atque in primo physiologiam sive naturalem deglutitionem explicabo: in altero ejus pathologiam: & in tertio morborum deglutitionis therapiam addam. Faxit Deus feliciter.

CAPVT I.

PHYSIOLOGICVM

SISTENS INSTRVMENTA ET MODVM DEGLVTITIONIS.

I.

DEglutio itaque est actio animalis sive voluntaria, qua cibum & potum ex cavo oris & faucium per œsophagum in venticulum deducimus, inter corporis humani actiones certe satis intricata, quæ tam variis partibus amice
simul

simul concurrentibus operose, attamen tam cito & facile peragitur, ut non attendamus fere: verum non omni plane vacat periculo, nam ubi error loci minimus committitur, ut si guttula vel micula in asperam incidat arteriam, statim tussis movetur, si vero frustum panis, vel carnis, aliave corpora peregrina illabantur, subita quandoque imminet mors. Inter organa vero deglutitionem promoventia, quæ externe introspicienti in os visui occurrunt, primum se offert considerandum os ipsum: quod est magnum cavum, constructum à labiis, buccis, palato; ubi statim in anteriori ejus parte mandibulæ duæ cum suis infixis dentibus, dividentes illud in anterius, quod à labiis, buccis, gingivis & dentibus circumscriptum, & posterius cavum, quod pone dentes positum & fere ovatum est. formatur vero hoc posterius in superiori parte à palato dentibus superioribus interjecto, quod in anteriori parte osseum, concavum, & quasi fornicatum, à parte inferiori ossis maxillaris superioris & toto osse palati compositum, quodque membrana, in anteriori parte leviter fulcata, firmiter obductum, à quo procedit palatum mobile in parte posteriori, quod veli instar pendulum est, è cujus lateribus utrinque procedit arcus rubeus, tremulus & geminus, qui ab utroque latere radici linguæ, inseritur: in medio vero & extremo margine pendet uvula sive columella, quæ est posticæ partis palati elongata teretiuscula aut quasi conica pars, linguæque radici fere incumbens: inferiorem partem sive fundum oris constituit membrana oris & lingua ipsa, quæ inter gingivas & latera dentium procedens ad fauces tendit, & denique ossi hyoidi nectitur: qua depressa in rictu videtur magnum cavum posterius, in quo eminet epiglottis, post hanc inferius glottis, & denique magnum foramen sive hiatus, figura fere infundibuli, qui pharynx vocatur ad œsophagum ducens. Hisce generalioribus præmissis, mearum partium erit, ut hæcce organa paulo propius examinem, imprimis ea, quæ jam masticata alimenta ad ventriculum promovent,

vent, atque hoc præcipue per musculos eorumque môtus, quibus qualibet pars instructa est, itemque per infinitos magnos parvosque fontes salivales, cryptasque mucosas effici, credo omnes habebo consentientes.

II.

Ad LINGVAM itaque me converto, quæ præterquam quod gustus sit instrumentum & animæ nostræ optimus interpres, non minimam in deglutitione præstat operam. Quam mira enim celeritate non suos absolvit motus, nam modo expanditur & lateſcit, modo stringitur, modo antrorsum movetur & extra os exferitur, modo retrorsum trahitur, nunc ad superiora, nunc ad inferiora, jam dextrorsum, jam sinistrorsum ducitur, atque sic in omnem partem flectitur & movetur. Quatuor vero ei annumerantur musculorum paria, quorum 1) est *Genio-glossum*, quod ab interna media & aspera menti parte carnoſo, sed satis angusto oritur principio, mox latius procedens per totam fere linguæ longitudinem inferius extenditur, eamque ingreditur, & pro lingua exferenda & contrahenda infervit. Cui è regione ſiti ſunt 2) *Baſſo-* & 3) *Cerato-gloſſi*, quorum illi à baſi oſſis hyoidis, ſeu mediæ & ſuperiori ejus ſede proveniunt, & non modo linguæ radici inſiguntur verum etiam fibris ſecundum longitudinem exporrectis ad apicem uſque linguæ excurrunt: hi vero à cornubus oſſis hyoidei exorti lato carneoque initio, adſcendentes largo fibrarum ductu inferuntur in linguæ latera juxta ejus radicem. hi una cum præcedentibus linguam retrahunt, & breviorē faciunt, item deprimunt & explicant. 4) tum par conſtituunt *Stylo-gloſſi*, qui à parte externa proceſſus ſtyliodis oſſis temporum acuto & carneo principio originem ſumentes, & craſſiores latioresque facti obliquo in anteriora deſcenſu ſe ſe inferunt poſticæ & laterali linguæ parti, atque actionibus ſuis linguam ad latera trahunt, retrorsum ac ſurſum movent, & palatum, verſus elevant. Atque hi muſculi omnes etiam

B

ipſum

ipsum linguæ corpus formare videntur, dum vario reptatu & commixtione, in quorum enodatione *Malpighius* certe felicissimus fuit, uniuntur, cujus fibræ longitudinales linguam breviorē reddunt, transversæ linguam arctant, perpendiculares linguæ crassitiem minuunt, angulosæ linguam introtrahunt, rectæ basin linguæ comprimunt, aliæque acuminatum ejus dorsum deprimunt. Cæteras vero linguæ partes, ne nimis prolixus sim, quæque nihil ad nostrum scopum conferre videntur, prætermitto.

III.

Ad linguæ motum & deglutitionem promovendam, haud parum adjumenti adferre videtur os *HYOIDEVM*, cui simile non est in corpore humano, dum nulli ossi articulatur, sed totum liberum, & tantum per musculos & ligamenta variis in locis alligatur, quodque repositum est in summo gutture, inter linguæ basin laryngemque, nec minus linguæ fundamentum firmum insimulque mobile præstat, ut sic harum partium motus uno eodemque fere perficiantur tempore. Dirigitur vero ejus motus præcipue per V. musculorum paria: quorum Imum sunt *Genio-hyoidei*, qui ab interno mento juxta synchondrosin maxillæ inferioris, sub genio-glossis orti, affiguntur basi ossis hyoidis, illudque ac ei annexa antrosum sursumque valide ducunt: quibus contrarium motum imprimunt 2) *Sterno-* & 3) *Coraco-hyoidei*: quorum illi modo à sterno & clavicula, modo à solo sterno, modo à sola interna clavicula, parte sterni vicina oriuntur, & parti baseos ossis hyoidis anteriori inferuntur. hi vero rotundi ac carnei principium sumentes à superiori costâ scapulæ ad radicem processus coracoidis, progressuque, ubi sub mastoideo musculo transeunt, biventres facti affiguntur basi anteriori & cornubus ossis hyoidis: qui agentes os hyoides recta deorsum ducunt, & *Genio-hyoideorum* fiunt antagonistæ. 4) tum par sunt *Stylo-hyoidei*, qui acuto carneo principio à processu styloformi ossis temporum orti, moxque latiores

res facti oblique antrorsum excurrunt, plerumque per mediam sui substantiam tendinem digastrici transmittentes, tandemque inferuntur articulationi cornu majoris cum osse hyoide & ejusdem basi, quorum ope retro sursum elevatur os hyoides cum annexis. statim denique efficiunt *Mylo-hyoidei*, qui larga aponeurosi ab interno inferioris maxillæ latere juxta dentes molares usque ad anteriora ejus orti largo tendine iterum affiguntur mediæ parti baseos ossis hyoidis. hi os hyoidis in omne fere punctum mandibulæ ad latera, sursum & antrorsum trahentes omnia simul elevant, quæ ei incumbunt, ut linguam laryngemque: nec minus salivæ excretionem ex glandulis sublingualibus, quibus immediate sunt substratæ, accelerant, & in os effluere faciunt.

IV.

Perlustratis sic linguæ & ossis hyoidis musculis ad LARYNGIS examen progrediendum, qui quamvis nihil ad deglutitionem facere videatur, tamen notabilis ejus inter deglutendum observatur motus sursum deorsumque, quo fit ut ejus apertura glottis dicta dum sursum elevatur, epiglottidi appropinquetur, & sic commode ab illa obtegi queat, ne transeuntia alimenta in tracheam incidant, variasque molestias creent. Larynx itaque cum aspera arteria ex variis cartilaginibus flexuosis est constructus, ut nempe iis semper apertis eo liberius aer pro respiratione in pulmones immitti, iterumque emitti possit; verum quoque cum alimenta deglutienda semper super laryngem ferantur, antequam ad Pharyngem perveniant, necesse est ut tempore illo laryngis rima non sit aperta, sed exacte obfirmata. Supervacaneum duco hic recensere cartilagines laryngis, excepta illa *Epiglottide* dicta, quæ ad similitudinem hederæ folii plerumque accedit, & superiori & anteriori thyroidis cartilaginis parti super quam mox post radicem linguæ erecta eminet, juncta, ab ossis hyoidis sinu excipitur, ut adeo respectu coe-

terarum cartilaginum altiore obtineat locum : & quamvis larynx firmiter per ligamenta basi linguæ & ossi hyoidi annectatur, quibus elevatis & ille sursum trahi possit, tamen peculiare musculi hanc elevationem facilitare videntur, uti sunt *Hyo-thyroides*, qui carnei ab inferiori sede ossis hyoidis orti descendentes parti laterali & inferiori cartilaginis thyroideæ seu scutiformis ampla insertionem affiguntur; qui attollendo laryngem rimam ejus epiglottidi proximius adducunt, quo sic omnimode obtegi & claudi queat. Postea larynx in sedem suam reponitur à *Sterno-thyroides*, qui à sterni mediæ & interiori facie ultra latum digitum infra Sterno-hyoides proficiscuntur, post è pectoris cavo emergentes sensim ad latera vergunt, & obliqua insertionem ad lateralia thyroidis tubercula terminantur. Non minus quoque Epiglottidi famulantur musculi deprimentes illam & rursus attollentes; & quamvis huc usque tantum in brutis epiglottidi concedebantur musculi, licet à IAC. SYLVIO duo attollentes totidemque deprimentes indicaverant, tamen jam homini quoque restituuntur, & à I G. PAVLI rursus describuntur. Illi enim attollentes satis longi à basi ossis hyoidis ad posticam epiglottidis radicem protenduntur, & *Hyo-epiglottis* vocantur, qui vero à Littrio & Santorino pro unico attollente habentur: hi vero deprimentes *Ary-epiglottis* dicti minores sunt, qui ab arytanoidarum cartilaginum apicibus orti, oblique & antè ad epiglottidis latera delati inferuntur. quibus Santorinus thyro-epiglottidæos duos majores totidemque minores addit, qui vero; ut ipse affirmat, tenuiores sunt, præsertim ultimi, ut vix nisi in robustissimis cadaveribus videri queant, & propterea etiam eorum locum tantum membranula observantur, ut Cel. HEISTERVS Comp. Anatom. pag. 169. indicavit. Denique & Epiglottis variis instructa est ligamentis, quorum unum medium & antè linguæ, duo lateralia ossis hyoidis cornubus, & duo posteriora arytanoideis cartilaginibus eam annectunt, & sic

fic pro deprimenda & rursus elevanda plurimum va-
lent.

V.

Proximum est ut PALATVM mobile cum sua propen-
dente uvula, quod deglutitionis tempore narium foramina,
ne alimenta per ea sursum pellantur, claudere, & insimul
dum iterum deorsum trahitur, ea ad pharyngem propellere
debet, consideremus. Quam ob causam variis instructum
est musculis quasi tot chordis trahentibus: & quidem 1) par,
quod *Glossostaphilini*, sive potius *Glossopalatini*, qui a lateri-
bus linguæ in parte ejusdem inferiori exorti, arcum illum
anteriorem formant, & dein adscendentes insiguntur ad la-
tera veli penduli. 2) par quod *Hypero*-sive *Pharyngo-staphilini*,
hi latam & amplam a parte inferiori pharyngis originem ha-
bent, qui assurgentes quoque instar arcus, qui posterior, sese
inflectunt, & sub Tonsillis excurrentes etiam partibus latera-
libus veli inseruntur, 3) veniunt *Thyro-staphilini*, qui ab imo
cartilaginis thyroididis latere orti feruntur in superiora cum
præcedenti pari, & in priorem mobilis palati partem se insi-
nuant, ac cum duobus paribus præcedentibus palatum ex-
pansum aliquantulum deorsum trahunt, & alimentorum de-
scensum juvant. 4) par constituunt *Salpingo-staphilini*, qui a
parte tubæ Eustachianæ posteriori, & quidem partim ex ejus
parte membranacea, partim ex ossæa originem ducunt, obli-
que dein descendentes posteriori & superiori uvulæ parti
inseruntur, eamque elevant & retrahunt. 5) par efficiunt
Pterygo-staphilini, qui orientes a suprema parte processus pte-
rygoidei & anteriori tubæ descendunt inter utramque illius
laminam, tendinesque circum corniculum sive apophysin
acutam & incurvam interioris laminæ processus pterygoidei
flecentes, quasi per trochleam ad anteriorem veli palatini
partem inseruntur, & sic deorsum antrorsumque illud mo-
vere valent. 6) par his accedit, quod *Cerato-staphilini* a Cel.
HEISTERO indicati & fig. 38. delineati, qui serie fibrarum

plerumque fatis conspicuarum e radicibus apophysium tenuium pterygoideorum processuum proveniunt, & tendineis suis expansionibus in velum palatinum desinunt versus uvulæ partem superiorem, quam cum sequenti pari sursum trahunt. 7) par præbent *Palato-staphilini*, qui orti utrinque ad juncturam ossium palati principio latiori, & conjuncti sensim angustiores evadunt, ac triangulum repræsentant, & descendendo uvæ parti superiori inferuntur, eamque sursum & antrorsum trahere videntur. Quibus ultimo annumeratur unum *Impar* sive *Azygos Morgagni*, qui pene ab ossea palati ora, qua narium septum imminet, inter musculos Hypero seu pharyngo-staphilinos, supra Salpingo-Thyro-ac Glossostaphilinarum fibras per pecticam mobilis palati faciem, ultra imam illius oram transversum digitum fistitur, qua multo gracilior fit, ac proximius confertis glandulis & membrana oris circumdatus ipsum corpus uvulæ efficit, & se mox contrahi, mox relaxari patitur.

VI.

Denique supersunt & *Favces*, spatium illud, quod inter radicem linguæ, laryngem & vertebrae colli positum est, quod alias *PHARYNX* seu oesophagi principium appellatur; cum vero illæ ferme sint collapsæ extra deglutitionis actionem, nisi ea parte, ubi os hyoideum eas distentas, pro admittendo aëre in tracheam & pulmones, & pro illo iterum emittendo, servat, hinc ut bolum seu alimenta commodius recipere, eisque receptis ulterius in oesophagum propellere possit, *varii muscoli pharyngem attollunt, dilatant, & rursus constringunt*: Ex quibus primum par efficiunt *Stylo-pharyngæi*, qui lato carneo-tendineo exortu a processus styloidei radice proficiscuntur, post tres circiter latos digitos demissi ad pharyngis lateralem angulum bifariam dividuntur, quorum tenuior & superior pars pharyngem subit infra Glossopharyngæum mox describendum, quæ rursus bipartita, superior

rrior & tenuior interius in posteriora pharyngis contendere videtur : altera inferior & crassior in interiorem pharyngis faciem producta ad inferiora deducitur : altera vero major a prima divisione ejusdem musculi portio in superiorem cartilaginis thyroidis oram , & quam maxime in eiusdem latus inseritur : atque sic non tantummodo pharyngi, verum etiam laryngi plurimum famulari constat. 2) par præbent *Cephalo-pharyngæi*, qui ab apophysi anteriori ossis occipitis ante foramen magnum conjunctim orti descendunt fuis tenuatisque fibris, & in posteriorem exterioremque pharyngis faciem coeteris fibris implexi pene evanescentes desinunt. ex his *Santorinus* unicum constituit musculum, eumque solitarium seu Azygos pharyngis dicit. 3) par sequitur, quod *Pterygo-pharyngæi* qui tum a processus pterygoidis corniculo, tum ab interioris alæ crepidine lati sed tenues procedunt, & in posteriora pharyngis inseruntur. 4) par constituunt *Salpingo-pharyngæi*, qui tenui tendineoque principio a postico cartilagineo Tubæ Eustachianæ margine originem ducentes, moxque carnei evadentes recta se demittunt, ac sub pharyngis membrana per interiora latera in ima descendunt. Hos cum tribus præcedentibus paribus musculorum pharyngem attollere necesse est. 5) par suppeditant *Mylo-pharyngæi*: hi tenui, acuto, tendineoque principio ab inferiori maxilla pone ultimum dentem molarem exorti, mox laxiores proximique *Pterygo-pharyngæi* fibris copulati, post lenem inclinationem provecti ad superiora pharyngis contendunt, eique applicantur, hi pharyngem non modo in priora trahunt, & utramque faciem quodammodo adducunt, ut & paululum inferiorem partem, cui adhærent, attollunt, sed etiam Tonsillas, quas complectuntur, comprimunt, & detrudendis cibus expressum humorem immittunt. hocce par musculorum jam a *Douglasio* in *Myographia* sua Londini 1707. edita, itemque a *Cantio* impet. anatom. descriptum est, hinc *Santorino*, qui novum illud appellat, idque a se primum descriptum esse affirmat,

firma, inventionis gloria tribui nequit. 6) veniunt *Glosso-pharyngæi*, qui à linguæ latere prope abscedunt, & deorsum delati infra Mylo-pharyngæorum fibras in posteriorem pharyngis partem sese inserti conjiciunt, ac superioribus musculis coadjutores se præbent. Ultimo denique est *Oesophagus*, sive gulæ sphincter, qui iterum à *Valsalva* & *Santorino* in tria distincta paria dividitur & Hyo-Thyro-& Crico-pharyngæi à variis nepe eorum originibus appellantur, dum priores connectuntur appendicibus, & processibus cornutis ossis hyoidis: alteri ab utroque antico latere cartilaginis thyroïdis: & tertii à cricoide cartilagine originem sumunt, qui omnes versus posteriora pharyngis oblique tendunt, & in ejus medium lata expansione desinunt. ex his vero *Valsalva* Crico-pharyngæum pro vero constrictiore agnoscit. *Douglas* vero & *Cantius* adhuc in plures dividunt. Quoniam vero, ut recte *Celeb. HEISTERVS* dijudicat, eorum fibræ intime ut plurimum connexæ sunt, ut sine difficultate dividi nequeant, & raro tales divisiones, quales *Valsalva* Tab. V. & VI. pingit, quæ eas distinguerent, clare perspiciantur, hinc eorum numerus non est multiplicandus, sed sub unius sphincteris sive oesophagæi nomine comprehendi commodè possunt. cujus actio in eo consistit, ut, dum contrahitur, alimenta in *Oesophagum* protrudat, qui est canalis longus, angustus, post asperam arteriam situs, & defectui orbicularium annulorum in postica parte adhærens, jam magis ad sinistrum, jam iterum magis ad dextrum ejus latus vergens, sed plerumque recta descendens usque ad quintam thoracis vertebam, ubi ob aortam descendentem non nihil dextrorsum cedit, & ad nonam circiter vertebam cum eadem laevorsum deflectit, tandem per diaphragma carneum transiens plerumque amplior factus in ventriculi orificium superius sive sinistrum implantatur. Componitur vero ex diversis tunicis sibi invicem superimpositis, quarum prima & extrema est membranacea, in thorace cum pleura continua, coeterasque

rasque investiens. altera musculosa, ex duplici serie fibrarum constans, quarum exterior ex fibris rectis ac longitudinalibus, interior vero ex orbicularibus sive annularibus, non vero spiralibus, ut in bobus. Hæ fibræ satis expansiles sunt, ut possint admittere bolum & contractæ ulterius propellere, illæ non solum has coercent, sed & canalem hunc accurtant, & descensum boli juvant. tertia cellulosa, flatu tantum separanda ac præcedentem cum quarta connectens, quæ nervea, multis vasculis sanguiferis ac glandulis instructa, postquam sequitur villosa, humore lubrico ex arteriis apertis osculisque glandularum stillante obducto.

VII.

Antequam vero ad actionem ipsam accedam, videndum quoque quam egregie his partibus sollicita prospexerit natura, ne ea ab alimentis siccioribus vel asperioribus lædantur, vel hæc plane in faucibus subsistant, dum omnem hanc viam humectat & lubricat liquidum quoddam, seque iis permiscet. Hocce vero liquidum duplex observatur: unum fluidius, *Saliva* nomine veniens, quæ variis in glandulis secreta iterum variis in locis in os deponitur, quarum insigniores sunt 1) *Parotides*, quæ larga copia per ductus *Stenonianos* juxta secundum vel tertium dentem molarem se aperiunt salivam fundunt. 2) *Maxillares*, quæ per ductus *Warthonianos* juxta radicem frenuli linguæ se aperiunt. 3) *Sublinguales*, quæ parvis ductulis sive osculis inter linguæ latera & gingivas utrinque in os hiant seque exonerant. Quibus & illæ duæ glandulæ circa dentes molares posteriores maxillæ superioris à *Celeb. HEISTERO* indicatæ & in suo *Comp. Anatom.* fig. 36. & 37. delineatæ, quas & mihi in ultimo cadavere benignissime monstravit, accensendæ sunt, quæque aliquot osculis excretorii salivale liquidum emittunt. Sic quoque foramen illud linguæ coecum alias appellatum, à *COLLINO*, *MORGAGNO* & *HEISTERO* delineatum, primus *VATERVS*

pro salivali ductu eoque primario habuit, in quod nonnunquam singulares ductus, ut à Cl. HEISTERO observatum est, se euacuant; eo vero deficiente plures circa basin linguæ aperturæ folliculorum instar observantur. ut taceam innumeras minores glandulas miliares & lenticulares per totum os, præcipue tamen per labia dispersas. alterum vero, quod jam paulo crassius & magis glutinosum sive *mucosum* in posteriori oris cavo, ut in palato pendulo, uvula, radice linguæ, tonsillis, pharynge, totoque ei continuato tractu œsophagi fecernitur, ubi hæ glandulæ muciparæ copiosissimæ sunt. Sic in pharyngis fornice, qui sub anteriori ac retuso ossis occipitis processu situs cartilaginosa Eustachii tubarum extrema interjacet, & posterius pharynge, anterius vero narium septo & cavitatibus terminatur, densa crassaque membrana plurimis cummulata glandulis, nunc unico ductu, ut Cl. HEISTERVS fig. 38, delineare curavit, nunc pluribus osculis, ut SANTORINVS notavit, incertæ magnitudinis ad instar spongiæ, quæ idem Cl. HEISTERVS in ultimo cadavere hæcce loca perscrutans mihiq; cæterisque commilitonibus monstrans annotavit, pertusa, copiosum mucum subministrat: qualem cumprimis quoque *tonsillæ*, duæ illæ notabiles glandulæ utrinque ad fauces juxta uvulam sitæ, & à transeunte bolo pressæ fundunt, ut sic undequaque allabente materia fluxili & mucosa bolus involvatur, & facilius in ventriculum deferatur.

VIII.

Apparatu itaque hoc exposito ad ipsam actionem me confero, ut explicem, quo ordine hæ partes conjunctæ agant, & alimenta in ventriculum deducant. Dum enim præmansum ac lubricatum deglutire volumus, linguæ apex per musculos Genioglossos protractus ubique pererrat os, conquerit manducatum & in unum corpus conglobat, quod bolus vocatur, tum deprehendimus linguam bolum mira celeritate recipere in suum dorsum, ut hæreat inter linguam & palatum, hoc

hoc facto firmitus adducimus maxillas, & claudimus os: raro enim apertum tenemus, quando deglutire volumus, possumus id quidem sed non fit nostro cum commodo: tunc lingua latefcit, sic ut eam amplitudinem & figuram acquirat ovatam, respondentem dentium ordinibus, ut sic formetur cavum fingulare ab anterioribus dentibus, lingua & palato, postea lingua promovet deglutiendum, quod molle & ductile, retrorsum, quod facile cedit in posteriora: hæretque tunc sub palato mobili supra radicem linguæ, ubi vero bolus diu hære nequit, quia locus est valde sensibilis, nam vix vel pluma possumus attingere illum locum quin irritetur: debet itaque inter radicem linguæ & palatum mobile retrorsum agi, quod fit dum radix linguæ attollitur fursum ac retrorsum trahitur, per Stylo-Basio- & Cerato-glossos itemque Stylo-hyoides, versus mobile palatum, tum eodem tempore & hoc agit, dum à Salpingo-Cerato- & Palatostaphilinis explicatur & instar magnæ valvulæ posticæ narium parti applicatur, ut sic impediat, ne in nares prematur bolus: ubi vero ibi hæret, non potest suo pondere labi exiguus bolus, sed magna vi deorsum premitur, tunc palatum à Glossopalatinis, Pharyngo- & Thyro-staphilinis trahitur deorsum ut sic propius linguæ fiat, quo tempore & uvula a Pterygo-staphilinis & Azygo accurtatur & retrahitur, ne transitum boli impediat. Quomodo vero bolus ad pharyngem nunc deferatur, ne in asperam arteriam cadat, jam explorandum. Veteres putavere huic officio servire epiglottidem, nempe bolum vel liquidum erectæ occurrere epiglottidi, hanc deprimere, sternere sibi pontem, ut ita transcendere possit: quod quidem aliquo modo verum: sed si hoc fieret à bolo majori, non tamen idem contingeret à minori vel liquidiori: nam epiglottis rigida satis & erecta à suis ligamentis & musculis tenetur, & glottis semper aperta pro in & expirando, pharynx vero & oesophagus semper clausus & collapsus, ne continuo omnia expirarent: deglutitionis vero tempore debet pharynx ape-

riri, trachea vero claudi. Videamus quid fiat : dum itaque radix linguæ attollitur, convulsivo quasi motu annexum os hyoideum quoque à Stylo-Mylo-& Genio-hyoideis cum appendensa larynge ab Hyo-thyroidibus antrorsum sursumque elevatur, inclinatur tunc epiglottis, adjuvantibus & ejus musculis deprimentibus, sic occultatur sub illa glottis, & insimul à musculis thyro-arytanoideis & ary-arytanoideis constringitur: eodem tempore aperitur pharynx, dum à Stylo-Cephalo-Pterygo-& Salpingo-pharyngæis attollitur, & à Mylo-& Glosso-pharyngæis dilatatur, sicque via panditur descensuro bolo : huc allato promovendus est ulterius ille bolus nam si glottis iterum aperiatur, illaberetur tamen in tracheam, hinc muscoli pharyngis relaxantur, os hyoidis à Sterno-& Coraco hyoideis, itemque larynx à Sterno thyroidibus cum pharynge paulatim trahitur deorsum, moles ejus ab Oesophagæo arctatur, constringitur & sic in oesophagum propellitur contentum, per quem denique mediantibus suis fibris orbicularibus & longitudinalibus in ventriculum deducitur. Tam operosa arte fit deglutitio, totque conspirantes organorum adeo multiplicium & concurrentium huc requiruntur actiones, ut summa admiratione digna sit.

IX.

Cum sic absolverim quæ ad deglutitionem peragendam spectare videntur, non inutile fore duxi, si hanc quæstionem *an fœtus materno adhuc inclusus ergastulo deglutiat, & sic quoque per os nutriatur*, subjungerem. Sunt quidem nonnulli etiam adhuc ex recentioribus, qui hoc perseveranter negent, & solum funiculum umbilicalem nutritionis opus in fœtu perficere asseverent, fœtumque nihil deglutire, neque deglutire, posse. Tamen variæ rationes & experimenta gravissimorum virorum me plane convincunt, quod deglutiat & sic etiam per os nutriatur. Quemadmodum enim percipitur fœtum in utero alias partes, brachia scilicet pedes & caput musculis suis

suis movere, cur non etiam linguam musculosque pharyn-
 gis movere, iisque destinatas actiones perficere poterit, eo-
 dem modo ac partibus modo recensitis. Ad quod uberius
 probandum Cel. SCHACHERVS in Disp. supra laudata de
 deglutitione sequens adducit experimentum: canem nempe
 gravidam vivam & partui vicinam scalpello subjecit, atque
 utero inciso & chorio dissecto, amnio vero cum incluso hu-
 more integro manente, in tribus quatuorve fœtibus accura-
 te observavit, eos non tantum modo os aperire, modo clau-
 dere, verum etiam linguam nunc retrahere, nunc palato
 applicare: & eodem tempore animadvertit, amnii liquorem
 ore aperto & lingua depressa se in faucium isthmum infi-
 nuare, eundemque lingua versus palatum elevata per gu-
 lam ad ventriculum urgeri, abdomine vero illorum leniter
 compresso eundem liquorem ex ore iterum effluxisse, Ob-
 jiciunt quidem fœtum non posse deglutire, quia non respi-
 ret, sine respiratione enim neminem deglutire posse dicunt:
 quam infirmo vero hoc argumentum stet talo, facile non so-
 lum ex jam citato experimento patet, sed etiam ex sequenti:
 nimirum si quis poculum liquido quodam repletum admo-
 veat ori, facile ille compressis naribus liquorem omnem ebi-
 bere poterit, ut nulla respiratione eo tempore indigeat: de-
 inde nullam video rationem quare non muscoli pharyngis
 & oesophagi modo dilatare, modo constringere se queant,
 quia hæc actio nulla ratione à respiratione dependet. Vt cœ-
 teras rationes brevitatis gratia jam prætermittam. Quo tem-
 pore vero embryo incipiat actionem deglutitionis peragere et-
 iam adhuc incertum est. Putant quidem, quod tunc tem-
 poris incipiat deglutire, quando organa huic actioni desti-
 nata aliquam perfectionem fuerint affecuta. Quoniam vero
 in prima fœtus delineatione sive rudimento sine dubio fora-
 minulum etiam pro ore futuro adest, quemadmodum fora-
 minula sive pori statuuntur & admittuntur ab omnibus in ra-
 diculis placentæ uterinæ, illudque si proportionem oris ad

minima placenta vascula considerem, longe amplius, haud à veritate mihi alienum videtur, etiam liquoris illius, qui in ovulo mox à primo conceptionis principio continetur, æque per foraminulum oris, quam per longe minores poros placenta vel funiculi umbilicalis intrare posse. Sed ne nimium à scopo meo extravagari videar, ad alteram partem hujus dissertationis me conferam.

CAP. II.

PATHOLOGICVM

MORBOS DEGLUTITIONEM LÆDENTES EXHIBENS.

I.

CONsideratis organis deglutitionem perficientibus, modoque quo nobilissima hæc actio contingit perpenso, jam ad morbos, quæ tam necessariam œconomix animalis functionem laedunt, aut prorsus destruunt, enarrandos atque examinandos progredior: ubi vero tam multi, tam magni atque tam graves sese offerunt, ut, si omnes pro dignitate exponere, eorumque causas pervestigare singulas vellem, integrum eumque haud parvum librum requirerent: adeoque ne limites dissertationis transeam, nonnullos tantum eosque præcipuos breviter, attamen quantum fieri potest, perspicue recensere studebo. Inter hos vero morbos, qui deglutitionem afficiunt male, aut impediunt, nonnulli vulgares sunt, frequenterque occurrentes: alii vero rariores existunt. Illos prius proponam, de his posterius agam.

II.

Ex morbis igitur, qui frequentius in deglutitionis organis observantur, primo sese offerunt *Inflammationes faucium:*
quæ

quæ nunc leviores sunt, nunc vehementiores, variosque inflammationis gradus agnoscunt, modo pauciores, modo plures partes occupant. Levior esse solet in uvulæ aut tonsillarum inflammatione, quanquam & hæ suas agnoscant diversitates & gradus, ita ut pro diversa inflammationis vehementia modo facilius, modo difficilius deglutitio succedat, cum magno tumore, dolore, rubore & loquelæ etiam impedimento, nunc majoribus, nunc minoribus. Vehementior vero longè, graviorque inflammatio in morbo *Angina* dicto fauces corripit: quippe in quo non solum partes modo nominatæ, verum etiam lingua, musculi uvulæ, ossis hyoidis, pharynx atque etiam ipse larynx inflammantur, sic ut non modo deglutitio, sed & respiratio quoque lædantur, quæ quandoque ita intercipitur atque sufflaminatur, ut ægris omnem tandem spiritum præcludat, eosque suffocet. In hoc tamen morbo quandoque magis organa deglutitionis imprimis pharynx, quandoque vero larynx magis patitur, sic ut aliquando vel nullus, vel levis saltem tumor in faucibus appareat, ægri tamen respirare non nisi difficillime possint: adeoque hæc priori longe est periculosior, quia deglutitione longe diutius carere possumus, quam respiratione. Oriuntur hæc quemadmodum aliæ inflammationes, a sanguine his in partibus copiosius congesto aut stagnante, unde quædam intumescunt partes, aliæ premuntur ac dolent, quo fit, ut debitas suas actiones haud perficere adeoque nec deglutire valeant. Non raro quoque tumores in faucibus oriuntur *pituitosi*, speciatim in uvula & tonsillis, quæ præcedentibus magis pallent, abestque tunc febris, quæ in illis præsertim in gravi angina vehementer sæpe affligit. Causæ antecedentes & remotiores horum affectuum sunt variae: modo enim plethorica corporis constitutio, quo sanguis non solum copiosus, sed etiam crassus & viscidus, aëre præsertim frigidiori accedente, his in partibus, ad quas cum impetu irruit, condensatur & stagnat, modo hæmorrhagiæ narium, uteri, hæmorrhoidum aliæque

sup-

suppressa, modo sanguinis missiones consueta intermissa, modo etiam cachectica ac pituitosa sanguinis dispositio hos tumores facit: hæc frigidos, illa calidos producit: inordinata præterea diæta, potus præsertim frigidus corpore calente haustus, itemque subita refrigeratio, quando calemus, dum aër frigidior in fauces irruit, facile ejusmodi tumores concitat. iter quoque facientes tempore frigido, pluvioso aut humido ac nebuloso, imprimis etiam illi, qui vento adverso equitant, præsertim si jam ad ejusmodi morbos dispositi sint, aut alias jam eis laborarunt, facile iisdem denuo corripiuntur. Ita crapula quoque non parum ad ejusmodi morbos producendos quamplurimum confert, suntque nonnulli, qui simulac vel leviter in vino bibendo excedunt, talibus tumoribus aut inflammationibus afficiuntur.

III.

Porro frequentioribus deglutitionis læsionibus merito annumerari possunt, si *Scirrhi* in tonsillis oriantur, a materia stagnante, tenaciori ac crassiori, ubi non nisi difficillime ægri ob viarum in faucibus angustiam deglutire possunt. Præterea ad frequentiores deglutitionis læsiones refero *ulcera* faucium, quorum notabile exemplum recenset HILDANVS cent. 1. obs. 37. tonsillarum, uvulæ, palati ac linguæ, speciatim etiam ea, ubi palatum ad nares usque exesum ac perforatum est: qualia nuper duo exempla cum Cl. HEISTERO hic vidi, ubi ægris, nisi lenissime & cautissime in deglutiendo procedant, liquida deglutienda mox per nares regurgitant. Quandoque hæc ulcera totam uvulam consumunt & exedunt. Vitia hæc admodum frequentia eis sunt, qui lue venerea vel laborarunt vel adhuc laborant, vel a nutricibus impuris veneno venereo infecti sunt: quandoque tamen etiam ab aliis causis, a quibus ulcera in aliis partibus oriuntur (quas omnes hic commemorare nimis longum foret) proveniunt, a quibus ægri quandoque miserrime afficiuntur.

Aphtha,

Aphthæ, quoniam ulcusculis suis non solum omnes oris partes verum sæpe etiam totum oesophagum obsident, deglutitionem quoque vehementer sæpe lædunt; id quod & à *variolis* haud raro fieri solet: itemque à *vulneribus* variis oris, linguæ, maxillarum &c. Præterea deglutitio sæpe læditur à *frusto nimis magno*, qualia exempla vid. apud FOREST. l. 15. obs. 28. schol. MARCELL. DONAT. lib. 3. Histor. Med. cap. 8. HILDAN. Cent. I. observ. 35. SCHVRIG. chylologia p. 285. & seqq. itemque à *peregrinis, faucibus aut oesophago impactis*, ut osse, spina piscis, nucleo mali persici, prunorum, nummo, aliisque similibus rebus, quæ liberum transitum deglutitiendis denegant. *Vva* etiam sive *columella* tantopere sæpe relaxatur à pituitosis viscidis humoribus, ut radici linguæ atque epiglottidi perpetuo incumbat, & deglutitionem magno pere impediatur & quandoque etiam respirationem.

IV.

Ad rariores vero deglutitionis læsæ causas sive morbos pertinet *Ranula sub lingua*, de qua, præter alios, exempla vid. in TVLP. observ. lib. I. c. 52. FABRIC. ab *Aquapendente* oper. chir. qui tam ingentem vidit, ut omnes actiones oris labefactaverit, itemque in MARCHETTI obs. med. chirurg. 31. qui exemplum habet *ranulæ ovi magnitudinem æquantis*, quæ deglutitionem atque respirationem valde lædebat. Præter ranulam vero alii adhuc tumores subinde in ore oriuntur deglutitionem impediētes: ita enim *tumorem gingivarum durum*, cartilaginofum quasi, mali punici magnitudine, extra os prominentem notavit ROVSSÆVS epist. med. 7. *Tumorem carnosum durum ex palato propullulantem*, linguamque ita prementem, ut nec loqui, nec cibum capere potuerit æger, vidit ROONHVYSEN obs. med. chirurg. part. I. obs. 21. *aliū vero ex palato enatum totasque fauces opplentem* observavit BONETVS Biblioth. pract. lib. 3. Sect. 4. obs. 2. *Similiter carnem fungosam in ore excrefcentem*, cibique ac potus

tus transitum impediētem descripsit MECKREN obs. med. chir. 14. *Prolapsum* vero sive *tumorem palati* TVLPivs lib. I. obs. 38. quo spiritus fere omnis adeoque & alimentorum transitus per os prælusus fuit. Ita & *Epulis* & *Parulis* in gingivis deglutitionem difficilem reddere possunt, de quibus morbis SCHELHAMMERI Dissertatio de *epulide* & *parulide* Jenæ olim habita prolixius videri potest.

V.

Columellæ absentiam in infantibus, qui quandoque ita nascuntur, magnum deglutitionis impedimentum producere, dum lac, quod sugunt, maximam partem per nares reddunt, præter alios notavit SALMVTH. Cent. 3. obs. 6. itemque G. W. WEDELIVS in Misc. Nat. Cur. Dec. II. Ann. 5. obs. 5. Hujus quoque absentiam palatumque simul fissum una cum labio leporino aliquoties se jam vidisse in infantibus recens natis mihi retulit Cl. HEISTERVS quo factum est, ut miseri ejusmodi infantes, quia sugere adeoque & deglutire nequiverunt, brevi plerumque interierint: ubi tamen notamus solum uvulæ defectum deglutitionem non semper impedire.

VI.

Polypus è naso post uvulam in fauces propendentes deglutitionem lædere res est notissima atque conceptu facilis: talemque mirabilem octo pedibus, fauces & ambas nares replentem describit atque delineat TVLPivs obs. 26. lib. I. cartilagineæ naturæ ovi gallinacei magnitudinem habentem retulit MECKREN obs. 12. aliumque pessimi moris descripsit GARENGEOT Tr. des Operations de Chirurgie Tom. II. chap. 36. atque jam Magdeburgi foeminam vivere ab amico percepit, quæ magnum ejusmodi polypum quoque in faucibus gerit, à quo in alimentis capiendis magnum impedimentum percipit. Quandoque etiam *carnea quadam excrescentia* in pharynge aut ipso œsophago excrescit, quæ gulam obturat, & degluti-

glutitionem tandem tollit: quale exemplum habet SYLVIVS lib. I. cap. 5. aliudque notatu dignissimum ingentis talis excrescentiæ sive polypi in gula à nimio pulveris sternutatorii Hispanici, vulgo Spaniol, usu excitati refertur in *Act. Erud. Lipsiens.* An. 1715. pag. 457. ubi etiam excrescentia hæc delineata & morbus proluxe descriptus sistitur, qua deglutitio tandem prorsus sublata & æger fame sitique incredibili emaciatum misere mortuus est. *Tuberculum in media œsophagi parte cancrosum deglutitionem impediens* BONETTUS assert loco citat. lib. 3. Sect. 4. obs. 28. Ex *Caruncula* post ulcus venerum in œsophago orta deglutitionem læsam fuisse RHODIVS memorat Cent. II. obs. 46. Similia impedimenta à *scirrhis, Steatomatibus* & excrescentiis in gula recenset BLANCARDVS Coll. Med. phys. Cent. III. cap. 54. pluraque apud alios adhuc scriptores descripta prostant.

VII.

His subiungimus *tumores œsophagum externe comprimentes*, atque sic deglutitionem alimentorum pessundantes: ita *calli aorta* descendentes meminit DODONÆVS, qui œsophagum in thorace ita compresserit, ut æger nihil fere cibi sumere potuerit, in not. ad BENIVENII *Exempla medica* lib. 30. *Aortæ aneurisma* œsophagum coarctans reperitur in *Histor. Acad. Reg. Paris.* An. 1700. *Thymum glandulam* tumefactam œsophagum arctasse BONETTUS scriptis consignavit l. c. Lib. I. S. 27. obs. 4. *Colli strumam cartilagineam* idem effecisse MECKREN auctor est obs. 34. aliumque colli tumorem gulam ita obturasse, ut ne ferreum quidem specillum per eam transmittere licuerit. TVLPIVS memoriæ prodidit lib. I. c. 44. *Glandulas dorsales*, quæ in postica œsophagi parte circa quintam dorsi vertebra sitæ atque naturaliter valde exiguæ sunt, quandoque etiam ita intumescere, ut omnem alimentorum transitum præcludant, sectione deprehenderunt TVLPIVS loco modo citato, DIEMERBROECKIVS *Anat. lib. II. cap. XVI.* VERHEYENVS in *Anat. cap. de Oesophago*, & Cl. HEISTERVS in *Comp.*

Anat. §. 389. Ita & à luxata vertebra colli œsophagus comprimitur & angustatur ut ægri tales deglutire nequeant. Notabile quoque exemplum prostat in VALSALVÆ Tr. de Aure humana p. m. 30. de osse hyoide in suis appendicibus luxato à deglutito crassiori bovillæ carnis non bene mansæ bolo, & sic pharyngem comprimente.

VIII.

Paralysis musculorum pharyngis & œsophagi efficit quandoque, ut hi cibum ad ventriculum protrudere nequeant: cujus exempla vid. apud TVLPIVM lib. I. c. 42. WILISIVM Pharmac. rational. part. I. Sect. II. cap. 2. STALPART van der WIEL obs. 27. part. 2. BONETTVM loco citato, aliosque, qui & contractionis spasmodicæ œsophagi, ob fibrarum ejus carnearum convulsionem meminit lib. 3. Sect. 4. obs. I. Angustiam quoque summam œsophagi post febrem ardentem reperit RHODIVS Cent. 2. obs. 48. ita ut gula aperto cadavere aquam non transmiserit. Ejusdem post exulcerationem *coalitum* SYLVIVS retulit lib. I. cap. 5. Totum œsophagum à claviculæ regione tantum quantum in *cartilaginem* mutatum neque pervium, nisi cavitate valde minuta vix setam porcinam admittente notarunt Misc. Nat. Cur. Ann. 13. obs. 70. callumque in eo OTTO HEVRNIVS observavit obs. 30. *Œsophago vulnerato* imprimis ubi in thorace hæret, deglutitio tollitur, nam assumpta non in ventriculum pervenire possunt, verum in cavum pectoris delabuntur. Idem etiam factum est in ægro, cui in vomitu œsophagus in thorace fuit ruptus, quæ memorabilis observatio à BOERHAVIO peculiariter libello, titulo *Historia morbi atrocis* exposita est. Alia fere ejusmodi valde notabilis ab HEISTERO in ultimis Actis Medico-physicis Academiae Natur. Curios. volum. I. pag. 392. descripta est, ubi absque violentia externa, sed ut videtur, ex prægressa inflammatione & sphacelo œsophagus perforatus est, atque assumpta in cavum thoracis influxerunt. In MAR-

CELLI DONATI præterea Historia medica lib. III. mirabiles deglutitionis læsiones litteris consignatas legimus, ad quem auctorem prolixitatis evitandæ causæ si omnes exscribere vellemus, lectorem ablegamus: ibi enim cap. III. *miræ gurgulionis inflammationes*. cap. IV. *linguæ miri tumores*. cap. V. *verruce in gutture*, cap. VI. *angina mirabiles*. cap. VIII. *œsophagi obturationes miræ* describuntur; itemque à SCHENCKIO in *observationibus suis*. BONETTO in *Sepulchreto Anatomico* ex quibus: quam multis modis hæc adeo necessaria nobis actio lædi possit, abunde cognoscitur. *Œsophagi vero inflammationes* tam vehementes notarunt HILDANVS cent. V. obs. 35. & DONÆVS exempl. med. cap. 17, ut neque potus neque cibus ullus ad ventriculum descendere potuerint.

IX.

In Ephemerid. Nat. Curios. Cent. VII. obs. 61. à LENTILIO notabile exemplum narratur mulieris, quæ omnia esculenta & potulenta deglutire potuerat, excepta sola *consecrata hostia* in sacra cœna: quam faucibus ingestam vomitu semper rejicere cogebatur idque per longum tempus. Alius ibidem à *fumo nicotianæ* hausto in magnam deglutitionis difficultatem incidisse refertur: quo tamen in casu dubius hæreo, utrum symptoma hoc à fumo nicotianæ an ab alia causa ortum traxerit, quia nulla convenientia argumenta, quibus hoc evinceretur, proferuntur, & tam multi sunt ubique, qui fumo hoc delectantur, & tamen nullo deglutitionis impedimento afficiuntur: male enim sæpe concluditur, *post hoc, ergo propter hoc*. nam ab aliis multis causis oriri potuit. Præterea in Ducatu hoc Brunsvicensi Nobilem eumque jam senem vivere a Cl. HEISTERO percepi, qui jam à longo tempore omnia deglutire potest, excepto ultimo semper bolo: qui ab uno sæpe pastu ad alterum sine notabili incommodo in faucibus hæret ac remanet, donec in subsequenti vel protrudatur, vel altera die cum scretu aut levi tussi rejiciatur. Præceden-

cedentem bolum semper à subsequenti pelli deorsum refert, ultimum vero, ut modo dictum est, in faucibus remanere. Multa multorum celeberrimorum Medicorum hac de re consilia petiit atque accepit, verum nullus forte adhuc veram hujus phænomeni causam, multo minus remedium dare potuit, quo à tædiofo hoc symptomate prorsus liberaretur. *Ab usu incauto Mercurii* deglutitionem & loquelam sæpe lædi, non solum in Misc. Natur. Cur. Dec. II. Ann. VI. obs. 107. indicatur: verum frequens observatio etiam hoc docet: dum inde tonsillæ aliæque faucium glandulæ, ipsa lingua, imo subinde totum caput enormiter intumescunt. Varia adhuc alia deglutitionis impeditæ exempla atque observationes notatu dignas, postquam præcedentes jam collegeram, atque pro prelo conscripseram, deprehendi in SCHVRIIGII *Chirurgiologia*, quæ nunc demum in manus meas incidit p. 256. & seqq. ad quem librum B. L. qui plura scire desiderat, remitto, quia mihi tempus non superest, ut ea omnia excerpere possim.

CAP. III.

THERAPEVTICVM
CVRATIONEM MORBORVM DEGLV-
TITIONEM LÆDENTIVM DOCENS.

I.

Quoniam Medico non sufficit nosse partium corporis humani fabricam earumque læsiones & morbos, verum etiam simul, imo quam maxime requiritur, ut eorum curationem quoque, sive modum, quo eos tollat aut sanet, rite sciat: vel, si insanabiles, ut & hoc probe intelligat, ne frustra eos curandos aggrediatur & suscipiat: aut in prognosi facile erret, & curare promittat morbos, qui tamen despera-

sperati sunt, & curationem nullam admittunt, atque sic hoc ægris, aut amicis, vel adstantibus prudenter ac mature indicet, ne postea, si res præter expectationem male cedat, homines cognoscant, Medicum morbum falso facto prognostico non recte intellexisse. Quapropter operam nunc dabimus, ut morborum horum, qui sanari possunt, curationem maxime idoneam ac rationalem hic tradamus, ac deinde etiam eos, quos immedicabiles esse, experientia, ratio, atque observationes docuerunt, simul indicemus.

II.

Inter morbos harum, de quibus agimus, partium sanabiles *faucium inflammationes* se nobis primum offerunt: quæ cum in congestione aut stasi sanguinis abundantis crassi & visceri plerumque consistant, siue sint in uvula, siue in tonsillis, pharynge, aut lingua, seorsim siue in variis hisce partibus simul, conducunt interne omnis generis blanda diaphoretica ac resolventia, ut Ess. Pimpinell. alb. Scordii, aliæque similes Diaphoreticæ, Alexipharmacæ aut Bezoardicæ dictæ cum infuso vel decocto aqueo herbæ Theæ, Veronicæ. Scordii vel Salviæ &c. bis, terve in die, & speciatim mane in lecto, cum regimine blando sudorifero usurpatæ: quod egregie promovetur, si larga ejusmodi infusorum vel decoctorum copia sensim sensimque calide superingeratur: qua methodo subinde mox primo alterove die nonnullæ harum partium inflammationes, dolores & tumores in faucibus, tonsillis & uvula resolvuntur atque sanantur. Circa vesperam, itemque circa somni tempus magno cum fructu ægris pulveres diaphoretici, resolventes ac temperantes, ex Lap. Cancr. citratis, Conchis citratis, Salibus mediis, ut Tartaro Vitriolato, Arcano duplicato itemque Nitro depurato vel antimoniato, ac Cinnabari nativa vel Antimonii ex Aquis Diaphoreticis, quales sunt Aqu. fl. Sambuc. Galegæ Scord. Card. bened. C. C. Citrata &c. exhibentur.

III. Ægris

III.

*Ægris vitandum est frigus, quia resolutionem impedit, & coagulationem ac stagnationem humorum auget. Quam ob rem collum & genæ linteo complicato calido cum vel sine sale calido involvantur in malo leviori : in graviore vero præstat sacculos ex Herbis resolventibus, ut Herb. Origan. Serpilli. Rorismar. Satureiæ. Menthæ. Majoran. &c. Flor. Chamomill. Melilot. Sambuci &c. Camphora imprægnatis, vel Spir. Vini Camphorato calido irroratis applicare. Solus etiam Sp. Vin. Camphorat. calide cum linteo ab radicem linguae & regionem tonsillarum externe illitus aliquoties in die, vel cum linteo complicato impositus egregie sæpe conducit, præsertim si postea sacculus sale, vel Furfuribus tritici, vel farina calida plenus, aut ipsi sacculi herbarum superimponentur modo laudati. *Emplastrum* de Meliloto Camphora præsertim largiter imprægnatum, & calide collo circumpositum, potenter quoque resolvit ac discutit, maxime si aliquis ex sacculis antea indicatis calide sæpius circumjiciatur, quo vires ejus resolventes valde augmentur. *Gargarismata* quoque hic non negligantur resolventia atque æstum sive ardorem in faucibus temperantia ; quale egregium, simplex quidem, sed præstantissimum usuque probatissimum habet Cl. HEISTERVS R. Auric. Jud. sive Fungi Sambuci ℥ij*

cōq. in f. q. Aqu. Simpl. per ¼ horæ

colatur : R. ℥viii. adde

Syr. Mororum ℥j

Nitri depurati ℥ii

Alumin. crud. ℥ss. M.

quo decocto fauces sæpe calide gargarizentur, vel etiam quandoque cum siphone caute injiciatur. Alia fieri possunt ex decoct. flor. malvæ. rosarum. Sambuc. Ligustri, vel seorsim vel combinatim sumtis, quibus eadem aut similia addi possunt, ingensque eorum varietas apud autoresprehenditur.

IV.

Dietam ægri servant tenuissimam, si cito curari volunt nihilque nisi juscula tenuia, temperantia, speciatim ex hordeo, avena, aut farina parata, loco cibi assumant, quorum priora Succo Citri vel Aceto vini ad gratum saporem imprægnata, egregie simul æstum internum temperant. *Potus* ægro, quam diu adhuc deglutire aliquo modo potest, concedatur tenuis, aquosus & largus, sed vel calidus vel saltem valde temperatus: frigidus enim valde nocet, atque ex levi inflammatione facile gravem aut prorsus lethalem efficere potest. Itaque ante omnia conducunt infusa vel decocta illa aquosa supra laudata ad modum Theæ calide sæpius forbillata: quibus subinde cerevisia tenuis defecata, ubi habetur, interponi potest, non frigida. Aut ubi hæc non prostackret, utilissimum decoctum his in morbis & quamplurimis aliis, ubi æstus temperandus & humores viscidī stagnantes resolvendi, conficitur ex Hordeo excorticato & passulis minoribus diu probeque coctis, cujus colaturæ additur pauxillum vini rhenani, quarta circiter pars, & sachari quantum sufficit ad gratiam: atque hoc decoctum haud ingrati saporis pro lubitu, tamen sæpius loco potus ordinarii calide aut tepide, aut moderate frigide bibat. Neque metuendus hic est æstus a vino admixto, quippe quod copiosa aqua satis temperatum est. Quibus Citri sapor acceptus, aliquot taleolos citri pro lubitu adjicere possunt. ita enim hic potus egregie diluit, resolvit, æstum temperat, sitim minuit, diaphoresin promovet, atque sic omnibus indicationibus egregie satisfacit.

V.

Si *alvus non succedit*, quemadmodum sæpius his in casibus fieri solet, idoneum laxans ægro exhibendum: ita enim a faucibus ad inferiores partes utilissima sit revulsio, intestinisque a fecibus præsertim induratis liberatis, motus sanguinis per abdominis viscera aliasque partes inferiores liberius fieri potest; quo fit, ut impetus ejusque congestio a capite

revocetur, tumoresque inflammatorii in faucibus minuantur, tandemque sæpe brevi post omnino resolvantur. Minime autem hic conveniunt purgantia acriora, calefacientia aut refinosa, aut quæ Aloë & Myrrha larga copia ingreditur: verum cæteris præferrem potiunculam purgantem *Sydenhami*, vel Aquam Laxativam mannagetæ, aut aliam similem ex temperatis, Tamarindis nimirum, foliis fennæ, Rhabbarbo & Manna confectam, quæ blande alvum evacuant, nullumque orgasmum in sanguine concitant. Si difficilius jam deglutiant, aut purgantias ægre assumant, clysmata etiam idonea horum loco adhiberi possunt.

VI.

In malo paulo pertinaciori, quod prædictis non mox cedit, præter hæc, Cl. HEISTERVS qui sæpe tonsillarum & uvulæ inflammatione olim affectus est, *scarificationes* sive *cucurbitulas cruentas* non solum dorso, verumetiam extus regionis tonsillarum utrinque mox sub angulis maxillæ inferioris tam in se, quam in aliis in ejusmodi morbis utilissimasprehendit: quippe quæ potenter revellunt & simul satis largam sanguinis crassi & visceris copiam educunt atque evacuant, ut reliquus postea facilius dilui, resolvi & in naturalem circulum redigi possit. In vehementiori ejusmodi malo Joseph VALLISNERIUS vesicatorio suturæ coronali apposito, cæteris frustra adhibitis, mulierem ab instanti mortis periculo se liberasse affirmat. Ephem. Nat. Cur. Cent. VII. & VIII. Qui a cucurbitulis forte abhorrent, ut fieri quandoque solet, venæ sectio substitui posset, vel in brachio, vel, quam adhuc magis proficuum censerem, in pede, quæ præferim, si pedes prius aquæ tepidæ aliquamdiu immissi fuerint, motum sanguinis a capite & faucibus adhuc fortius revocat.

VII.

Quando vero hæc inflammationes sunt vehementiores, & cum deglutitione læsa plus minus respirationem impediunt,

unt, tunc proprie *ANGINA* appellantur, qui morbus est acutissimus atque periculosissimus, non tam propter deglutendi facultatem laesam, quam propter spirandi difficultatem: quia in ea spiritus non tantum impeditur, sed haud raro prorsus tollitur, ægerque vere suffocatur. Adeoque quia ex spirandi potius, non vero ex deglutendi facultate laesa hi agri tam periculose plerumque decumbunt, cognoscitur inde organa magis respirationis quam deglutitionis affici, atque sic morbum hunc ad nostrum scopum proprie non pertinere. Interea tamen quia in vera angina deglutitionis actio simul quoque læditur, paucis, quantum fieri potest, quomodo curanda sit, dicemus.

II X.

Interne & externe eadem prorsus exhibenda esse censeo remedia, quæ in præcedentibus ad tonsillarum, uvulæ aliasque faucium inflammationes commendavi, & solum hic moneo, quod medicamenta diluentia, resolventia, temperantia, imprimis potus laudatos, quamdiu bibere & aliquid deglutire possint, frequentius assumant, corpusque tranquilliore continentia inlecto adhuc magis & curiosius ad diaphoresin atque resolutionem disponant. Deinde in hoc morbo mox ab initio, clystere præmisso, sanguinis missionem per venam sectam primo in brachio vel pede, eamque satis largam, adhibendam esse duco, qua in tonsillarum aliisque levioribus faucium inflammationibus ut plurimum superfedere possumus. Postea vero quando in augmento morbi deglutitio adhuc magis læditur, ut vix ac ne vix quidem potus aut medicamenta amplius assumi possint, tunc externis potissimum auxiliis, iisque quandoque solis succurrere cogitur Medicus: Inter quæ vero potentissima atque efficacissima esse existimo *V.S.* iteratam, nunc in pede, nunc in brachio, nunc in ipso jugulo, sanguisque semper larga satis copia educatur, adhibitis interea frequenter clysteribus emollientibus, temperantibus, revellentibus, itemque laudatis gargarismatibus, emplastris, epithematibus, nec non sca-

rificationibus in dorso aut humeris, ut & sub angulis maxillarum, ipsisque tonsillis institutis, & si hæc omnia nondum sufficerent, quod tamen raro in ægro morigero continget, *vena* etiam *ranina* sub lingua aperiantur, prædictis interea semper continuatis. Sin vero suffocationis periculum immineret, intrepide atque in tempore ad *Tracheotomiam* sive sectionem fistulæ spiritalis tanquam ad sacram anchoram confugiendum esse multis cum gravissimis judico, ne æger fato suo certave neci relinquatur: cum plures jam, ut autores fide dignissimi scriptis reliquerunt, extremo hoc remedio restituti & ex orci faucibus quasi erepti sint. Quomodo vero ea fieri recte debeat, brevitatis causa B. L. ad JVL. CASSERIVM cap. de Bronchotomia. MANOVII Bronchotomiam, CLAR. HEISTERI Chirurgiam cap. de Bronchotomia. GARENGEOT Tr. des Operat. de Chirurg. chap. 32. de l'operation de la Bronchotomie, aliosque chirurgicos scriptores remitto.

IX.

Quando vero inflammatorii faucium tumores ad *suppurationem* vergunt, quod cognoscitur, si tumor post quatuor vel quinque dies non minuatur, sed potius indies cum deglutiendi difficultate augeatur, tensionesque dolorificæ per totum sæpe caput, præsertim vero per aures sese extendant, spirandi facultate vel omnino salva, vel utcunque solum læsa, tunc maturatio omni modo est promovenda, maturatus abscessus aperiendus & postea ulcus rursus consolidandum. Hunc in finem extus collo sæpius applicanda sunt cataplasmata emollientia, vel ex herbis ac radicibus emollientibus, vel ex mica panis cum butyro & lacte coctis, addito pauxillo Croci, vel ex cepis sub cineribus assatis, parata. Intus in ore sæpe lac detineatur calidum, in quo ficus cocta: quæ etiam medium dissecta & assata intus tumori continuo admota egregie emolliunt & suppurant. Idem lac etiam sæpe siphone ad locum laesum, ubi tumor quam maxime eminet, impellatur, quo fit, ut abscessus maturus quandoque citius,

citius, quam alias fieret, rumpatur, atque sic æger citius a crudelissimis doloribus liberetur.

X.

Quod si vero hoc non fiat, ægerque misere patiat, doloresque acerbissimos, ut contingere ut plurimum solet, persentiscat, opera danda, ut *Scalpello*, si tuto fieri queat, aperiatur. Monemus vero hoc tam facile non esse ac multi sibi fingunt atque existimant, qui hoc nunquam præstiterunt, credentes, fauces semper ita patere, atque ad eas tam liberum aditum ac in sanis, ubi uvulam & tonsillas facile videre possumus: magnæ enim hic adsunt difficultates, quæ impediunt, quo hoc levi perfici negotio non possit: Nam propter inflammationem atque tumores ægri maxillas non diducere, adeoque etiam os ita aperire nequeunt, ut ad fauces libere inspicere queamus, sed apertura inter dentes utriusque maxillæ tam angusta est, atque lingua sæpe simul tam tumida, ut tonsillas vel abscessus vel prorsus non, vel vix ex parte videre, multo minus congruis instrumentis ad eos accedere valeamus. Quam ob rem cauto opus est: & si abscessus vel non conspiciatur, vel ad eum liber aditus non detur, negotium potius naturæ patienter relinquendum, quam intempestiva aut temeraria sectione aut punctura ægro jam satis afflicto novos ac plures adhuc concitare dolores, aut his ipsis nova eaque adhuc pejora mala producere: exempla enim mihi retulit Cl. HEISTERVS ubi in ejusmodi casibus chirurgi aperturam abscessus tentantes, alium locum inciderunt, unde non pus, sed merus sanguis effluxit, ægrique non modo nullum inde levamen, sed potius novos majoresque dolores, novas inde ortas inflammationes in acceptum retulerunt, expectandumque ipsis postea fuit, donec abscessus sponte fuerit ruptus; quod circa octavum vel novum morbi diem plerumque contingere solet. alias vero, quando ægri maxillas satis diducere valent, locusque sectioni opportunus, qui digito, ubi mollis perci-

pitur tumor, exploratur, cognoscitur, spatha deprimitur lingua, & phlebotomum, quod lanceolam vulgo vocant, in abcessum caute intruditur, vel peculiari & à Clar. HEISTERO primum descripto instrumento (vid. ejus Chirurgia Tabul. XV. fig. 13.) quod & spathæ & lanceolæ vices simul præstat, aperitur. Ad cujus normam aliud paulo incurvatum descripsit GARENGEOT Tr. des Instruments de Chirurgie Tom. I. p. 391. quibus tamen omnibus, si locum rite aperiendum videre non possumus, sæpe nihil boni efficitur.

XI.

Loco vero sive sponte sive artibus dictis aperto, dolores quidem mox minuuntur, ac deglutitio facilius succedit; attamen morbus nondum curatus, neque deglutitio libera omnino restituta est, verum oportet ut *ulcus probe purgetur*, & deinde rursus consolidetur: id quod decocto aliquo herbæ cujusdam vulnerariæ, ut Sanniculæ, Plantag. Agrimôn. Millesfol. Bellidis &c. melle rosato roborato fieri potest, si loco gargarismatis sæpe adhibeatur, & quandoque ope syringæ ad ulcus injiciatur, quo satis plerumque facile & sæpius intrabiduum vel triduum consolidatur, ægrique qui ante triduum morti vicini habiti fuerunt, jam libere deglutiunt, integræque sanitati restituti sunt. Atque sic inflammationes & abcessus, deglutitionem lædentes, optime tractantur, atque curantur. Proximum jam est, ut quid in tumoribus faucium pituitosis ac frigidis faciendum sit, dispiciamus.

XII.

In tumoribus igitur *pituitosis, frigidis*, qui sæpe uvulam & tonsillas male afficiunt, ubi tumores minus sunt rubicundi, minus plerumque dolent, abest febris, pituitam vero viscidam ac tenacem ægri sæpe rejiciunt, quæ omnia indicant, humores ejusmodi pituitosos in his ægris abundare, serumque nimis viscidum hic peccare. Hi morbi licet satis sint molesti, minus tamen periculi sovent, raroque ægri inde moriuntur, cum inflammatorii sint periculosissimi. In curatio-

ne igitur hoc serum partim corrigendum, partim evacuan-
 dum esse censeo. Evacuationem vero hic sanguinis missio-
 nibus haud bene perfici credo, quia sanguis proprie dictus
 non peccat, ægrique hi magis pituitosi sint temperamenti
 quam plethorici. Rectius vero purgantibus, sudoriferis ac
 diureticis, quæ in feri vitia longe potentius agunt, quam il-
 læ, fieri id posse judico, adeoque ejusmodi ægris apta dosis
 Pillularum vel de Succino Cratonis, vel Extr. Panchym. Croll.
 vel Balsamic. Becheri, vel Tartar. Quercet. aliarumve simili-
 um opportuno tempore danda, si eas adhuc deglutire vale-
 ant. Sin minus, Sales illos amaros catharticos, ut Anglica-
 num, vel Bohemicum, aut qui ad horum imitationem ex
 Sale marino & Sp. Vitrioli parantur, exhiberem, utpote quæ
 potenter serum educere, atque simul pituitosos humores re-
 solvere solent. Deinde vero ad eundem resolvendi ac simul
 vel per sudorem aut urinam evacuandi scopum, egregie hic
 valent Decocta Lignorum, vel etiam solius Ligni Sassafras in-
 fusum: quæ bis terve in die calide bibenda, & quidem ma-
 tutino tempore in lecto, corpore ad sudorem disposito, quo
 tantum sæpe efficitur, ut unico largo sudore, potu tali aquo-
 so calido producto, tumores hi pituitosi dissipentur, & de-
 glutitio libera restituatur. In graviori malo, vel ut tanto cer-
 tior sequatur effectus, Essentia quædam diaphoretica, ut ess.
 Lignorum. Pimpinell. Contrayervæ, Succini &c. Simul cum
 decocto ad gutt. 30. 40. sumenda est: vel Mixtura quædam
 diaphoretica ex Aqu. Diapnoicis cum antimon. diaphoret. Lap.
 Cancr. citrat. Resina ligni Guajaci &c. danda: in leviori vero
 malo solius herbe Thææ infusum ad sudorem usque in lecto
 sensim haustum sæpius sufficit, satisque egregium effectum
 præstat: quo simul etiam os sæpe collui, & loco gargarisma-
 tis adhiberi potest. Alias valde idoneum in hisce malis gar-
 garisma paratur ex Aqu. fl. Sambuc. ℥. vi. & Spir. Vini ℥j.
 vel jj, quod egregie resolvit & partes relaxatas roborat. Ex-
 rus eadem collo circumponi possunt, quæ N. III. laudavimus.

XIII.

Si SCIRRHI in Tonfillis deglutitioni remoram pariunt, quia ab eadem causa, viscidis scilicet ac pituitosis humoribus proveniunt, (sive inflammatio præcesserit, ut sæpe fit, sive non præcesserit.) iisdem etiam remediis, sed diutius continuatis, resolventibus scilicet, diaphoreticis ac diureticis, interpositis frequenter purgantibus præsertim mercurialibus curandi. Extus Empl. Diaphoret. Myns. aut de ranis cum dupl. mercur. adhibendum, & si his satis diu continuatis non cedant, leni salivatione, vel alio Mercurialium prudenti usu, si non nimis inveterati, sæpe resolvuntur. Sin vero nec his removeri queant, vel per caustica, vel si necessitas urgeat per sectionem auferendi, qua de re vid. Chirurgia Cl. HEISTERI, alique scriptores chirurgici.

§. XIV.

Si ulcera in faucibus, causa rite inquirenda est, antequam curatio suscipiatur, alias parum vel nihil proficimus. Si enim à venerea infectione, aliis medicamentis non sanantur, nisi hæc prius è sanguine congruis aut specificis contra venerea mala remediis eliminetur. Quapropter hic opus Decoctis & Essentiis Lignorum aliisque similibus in morbis venereis usitatis, ac diu continuatis, quibus sæpius purgantia mercurialia interponenda. Extus Melle rosato & Spir. Vitrioli actuato prius mundari, & postea vel eodem melle vel ol. Myrrhæ per deliq. vel Ess. Succini consolidari debent. Quandoque vero malum altiores in sanguine egit radices, ut non nisi Salivatione mercuriali cedat. Si palatum in nares usque perforatum est, ut plurimum foramina ejusmodi nulla arte rursus consolidari possunt, insufficiatque tunc, si modo dictis remediis & methodo caries sublata, ossaque carne sana rursus obducta fuerint, ne malum ulterius serpat: sique postea foramina illa tanta, ut, deglutitionem adhuc lædant, lamina argentea, vel aurea spongiola armata, obturanda: qua de re videatur SCVLLETVS, alique scriptores chirurgici.

gici. Sin vero hæc ulcera ab alia, quam venerea, oriantur causa, atque adhuc recentia sint, quemadmodum abscessus recentes tonsillarum curari possunt, eodemque etiam modo *Aphthæ* sanari solent. Quando vero jam inveterata, atque vel cachecticam vel scorbuticam agnoscunt dispositionem, iisdem remediis, quibus venerea curari diximus, sed sine salivatione, ut plurimum claudi possunt. Interdum tamen & hac opus est, quia ea ipsa etiam alia ulcera rebellia ac contumacia v. gr. in pedibus aliisque locis, sæpe curantur: quæ sine hac nullis quandoque remediis sanantur.

XV.

Quando in *Variolis* deglutitio male succedit, præ omnibus debitum his regimen & methodus congrua observetur: fauces deinde sæpe decocto avenæ calido gargarizandæ, crocus & camphora sacculo inclusa collo circumliganda, ac denique sufficiens & frequens potus calidus sumendus. Si ob læsionem à *vulneribus* deglutitio impediatur, hæc convenienti methodo sananda. *Frustrum nimis magno, aut peregrinis quibuscunque faucibus impactis*, quando haustu largo semel iterumque assumpto, aut bolo alio deglutito non cedant, instrumento idoneo, vel candela cerea flexili, vel ex osse balenæ flexili, spongia in apice instructo, vel excutia ventriculi aliove idoneo instrumento caute ad ventriculum detrudantur; cavendumque ne nimis diu ibi relinquuntur, quia alias nonnunquam inflammationes & gangrænam oesophagi, imo ipsam mortem prodixerunt: ut apud HILDANVM Cent. V. obs. 35. videre est. *Vvula nimis relaxata*, si gargarismatibus adstringentibus & roborantibus, aut gargarizando cum Spir. vini vel Aqu. Regin. Hung. pauca copia aquæ temperata aliisque similibus in statum naturalem reduci nequeat, vel forcice pars nimis longa & lædens, vel peculiari hunc in usum invento instrumento, quod Cl. HEISTERVS in Chir. Tab. XV. fig. 8. delineavit, provide refecetur.

XVI.

Ranula sub lingua, si materia p. n. in membrana aut folliculo

culo contenta, & simul ac semel extirpari potest, optimum est, ut cauta peritaque manu tota extirpetur : sin hoc tuto fieri non possit, aperiatur membrana sectione horizontali, materia evacuetur, folliculus attactu spir. Vitrioli frequenti, aut alterius similis medicamenti destruat, & consumatur, ac postea Melle rosato vel oleo myrrhæ per deliq. consolidetur. Si loco tumoris tunicati eodem, quo ranula oritur, loco *tumor inflammatorius* aut *abscessus* oriatur, curandus est, ut supra de faucium tumoribus & abscessibus dictum est. Quo ipso etiam modo *parulis* sive abscessus gingivarum, qui quandoque pugni magnitudinem æquant, sanatur. *Tumores ex gingivis* propullulantes, qui *epulides* dici solent, iique, qui ex palato veniunt, si molliores, lenioribus causticis, ut solutione salis ammoniaci, aut tartari, vel solutione ꝑ vivi in sp. Nitri non raro auferuntur, si sæpius eo scite tangantur. Sin vero duriores, aut cartilaginei, non nisi sectione tolli possunt, & curatio postea per balsamica perficienda. *Prolapsus subitaneus palati* periculosissimus apud TVLPIVM lib. I. obs. 38. sola scalpelli incisione, effusa multa aqua, detumescenteque mox palato sanatus, ægerque morti vicinus servatus est. *Columella deficiens* arte restitui non potest. Cum vero infans ita natus, usitato modo lac ex uberibus sugere non potuerit, suavit WEDELIVS ut papilla profundius ori infantis immergeretur, quo linguæ concursu facilius deglutire posset : quo factum est, ut puella hæc hoc modo sensim sugere disceret, & conservata fuerit. vid. Misc. Nat. Cur. Dec. II. Ann. V. obs. V. Quando vero cum defectu uvulæ totum palatum fissum, atque simul labium leporinum adsit, tunc suctio ac deglutitio fieri non poterunt ; ideoque malum est immedicabile.

XVII.

Polypi narium ad fauces dependentes, non nisi forcipis recurvæ ope, fortique manu sæpe auferri possunt. attamen quandoque nulla vi extrahi queunt, ut MECKREN obs. XII. testatur, sed forfice eum resecare coactus fuit. Quando

do carnea quædam excrescentia in faucibus hæreret, quæ videri posset, eodem modo forfice excidenda esset; ubi vero profundius in oesophago latet, ut in exemplo Lipsiensi N. VI. cap. II. relato, ubi accessus non datur, nulla etiam curatio locum habet: & hoc etiam propterea, quia morbum ante cadaveris sectionem ne quidem cognoscimus. Id quod etiam sentiendum de tuberculis, carunculis, verrucis, scirrhis & steatomatibus in oesophago eodem loco supra relatis: itemque de callo & aneurismate aortæ, ac thymi glandula gulam comprimente, ut & de glandulis dorsalibus, callisque oesophagi canalem hunc angustantibus, ac sæpe omnino claudentibus.

XIIX.

Paralysis musculorum gulæ, ut omnis alia paralysis difficillimæ est curationis. Interna vix usurpari possunt medicamenta, nisi externa, quia ea deglutire nequeunt. Externe igitur tentari possunt omnis generis nervina ac roborantia, quæ in aliis paralysisibus proficua observantur: ut Sp. formicar. Lumbricor. Rorismar. Vini Camphorat. Salis ammoniaci. Spiritus & liquor C. C. succinat. Aqu. Anhalidina, aliaque similia. Gargarismata simul adhibeantur ejusdem fere naturæ, imprimis etiam aqua salviæ fl. Paralyseos cum vino, sicuti in linguæ paralysisi, ita & hic prodesse poterit. Similiter Pulv. Aureus Cellensis, elæosaccharum cinnamomi, caryophyllorum, aut lavendulæ cum Sale vol. Succini mixta, ore dissoluta & ad fauces demissa, multum hic præstare possunt. Taceo jam vesicatoria capiti, nuchæ & sub auribus applicata, setacea in nucha, & quæ alias in paralysisi efficacia deprehensa sunt. Ne vero ægri interea dum deglutire nequeunt, fame pereant, CAPIVACCIVS lib.I.cap. 54. tubulum commendat peculiarem specie infundibuli, quo per os in oesophagum usque immisso, alimenta fluida, juscula, lac & similia infundi poterunt, donec æger a paralysisi illa periculosissima rursus liberetur. Adhiberi etiam hic simul possent enemata nutrientia ex jure carnium cum sale,

F 2

post-

postquam primo clysmate purgante alvus fuit elota, omniaque facienda, quæ ægrum conservare & a paralyfi hac liberare possunt.

XIX.

In spasmodica oesophagi contractione antispasmodica, pulveres antispasmodici nitrosi, cinnabarini, demulcentia oleosa, aquea, mucilaginosa extus intusque opponenda. Oesophago vulnerato, si vulnus est in thorace, quia omnia, quæ curandi causa interne exhibentur, in cavum thoracis effunduntur, pulmonem premunt, respirationem lædunt, & tandem putrescunt, ex arte nullum novi remedium, nisi forte fortuna sponte illud vulnus, si parvum est, coëat. Multo minus medela fuit speranda in ruptura oesophagi a BOERHAVIO & HEISTERO supra cap. II. N. VIII. observata.

XX.

Ab usu incauto mercurii si lingua & fauces intumescant, & deglutitio inde lædatur, clysteres fortes revellentes sæpius sunt injiciendæ, & si aliquo modo æger adhuc deglutire potest, purgantia ipsi exhibenda, ut hoc modo non solum vis mercurii a faucibus ad inferiora revocetur: verum etiam ipse mercurius per alvum evacuetur; ita enim tumores in ore minui, ægrique liberius rursus deglutire possunt, Caterum nimia oesophagi angustia a febris relicta, coalitus exulcerationem secutus, mutatio ejus in cartilagineam substantiam vel callum. N. VIII. cap. II. indicata, nullam admittunt curationem. Si a luxata vertebra colli vel a luxato osse hyoide, luxatio convenienti modo reponenda, tumoresque & inflammationes, quæ inde sæpe oriuntur debita methodo, medicamentis resolventibus atque antiphlogisticis curandi.

Pag. 4. lin. 31. *post osculis add. & glandularum excerniculis.*

p. 7. lin. 27. l. deglutitio.

pag. 12. lin. 18. pro *erant* l. *sunt*,

p. 16, lin. 29. l. protrudat.

F I N I S.